

tes capita sua, dicentes: Vah! qui destruis Templum Dei, & triduo reedificas illud, salva te ipsum. Si Filius Dei es, descende de cruce. Similiter & Principes Sacerdotum illudentes cum Scribis, & Senioribus dicebant: Alios salvos fecit, seipsum non potest salvum facere: Si Rex Israël est, descendat de cruce, credimus ei, confidit in Deo, liberet nunc eum. Dixit enim: quia Filius Dei sum. Et stabat populus spectans, & deridebat eum. Illudebant ei & milites accedentes, & acetum ei offerentes, & dicentes: Si tu es Rex Iudæorum, salvum te fac. Matth. 27. vers. 39...43. Marc. 15. vers. 29...32. Luc. 23. vers. 35...37.

*I. C. ab uno latronum blasphematur, ab altero iustus confitetur.*

CLVII. Unus autem de his, qui pendebant latronibus, blasphemabat eum, dicens: Si tu es Christus, salvum fac te ipsum, & nos. Respondens alter increpabat eum, dicens: Neque tu times Deum, quod in eadem damnatione es; & nos quidem iuste, nam digna factis recipimus, hic vero nihil mali gessit: & dicebat ad Iesum: Domine memento mei cum veneris in regnum tuum, dixit illi Iesus: Amen dico tibi, hodie mecum eris in Paradiso. Luc. 23. vers. 39...43.

*I. C. Matrem commendat Ioanni, Ioannem Matri.*

CLVIII. Stabant juxta crucem Iesu mater ejus, & soror matris ejus, Maria Cleopha, & Maria Magdalene. Cum vidisset ergo Iesus Matrem, & Discipulum stantem, quem diligebat, dicit Matri suæ: Mulier ecce Filius tuus, deinde dicit Discipulo: Ecce Mater tua. Et ex illa hora accepit eam Discipulus in suam. Ioann. 19. vers. 25...27.

*I. C. moritur.*

CLIX. Erat autem hora ferè sexta, & tenebrae factæ sunt in universam terram, usque in horam nonam: & obscuratus est Sol, & hora nona exclamavit Iesus dicens: ELOI ELOI LAMMASA-BATHANI, hoc est, *Deus meus, Deus meus ut quid dereliquisti me?* quidam de circumstantibus dicebant: Ecce Eliam vocat, videamus an veniat Elias liberans eum. Postea sciens Iesus, quia omnia consummata sunt, dicit: Sitio. Currens autem unus ex eis acceptam spongiam implevit aceto, & hyssopo circumponens imposuit arundini, & obtulit ori ejus; cum accepisset Iesus acetum dixit: Consummatum est. Et iterum clamans voce magna, ait: Pater in manus tuas commendo spiritum meum, & inclinato capite tradidit spiritum. Ex Matth. 27. vers. 45...50. Marc. 15. vers. 33...37. Luc. 23. vers. 44...46. Ioann. 19. vers. 28...30.

*Iesu Christo mortuo, signa & prodigia multa fiunt.*

CLX. Et ecce velum Templi scissum est in duas partes à summo usque deorsum, & terra mota est, & petrae scissæ sunt, & monumenta aperta sunt, & multa corpora Sanctorum,

qui dormierant, surrexerunt, & exeuntes de monumentis post resurrectionem ejus venerunt in civitatem, & apparuerunt multis. Centurio autem, & qui cum eo erant custodientes Iesum, viso terræ motu, & his quæ fiebant, timuerunt valde, dicentes: Verè hic Filius Dei erat. Et omnis turba eorum, qui simul aderant ad spectaculum istud, & videbant quæ fiebant, percutientes pectora sua, revertebantur. Erant autem à longè aspicientes mulieres multæ, quæ secutæ erant Iesum è Galilæa ministrantes ei, inter quas erat Maria Magdalene, & Maria Iacobi & Ioseph mater, & Salome mater filiorum Zebedæi, & aliæ multæ, quæ cum eo ascenderant Ierosolymam. Matth. 27. vers. 51...56. Marc. 15. vers. 38...41. Luc. 23. vers. 47...49.

*I. C. tollitur è cruce, & latus ejus lancea apertum est.*

Iudæi autem (quoniam Parasceve erat) CLXI. ut non remaneret in cruce corpora Sabbato (erat enim magnus dies ille Sabbati) rogarunt Pilatum, ut frangerentur eorum crura & tollerentur. Venerunt ergo milites, & primi quidem fregerunt crura, & alterius, qui crucifixus est cum eo. Ad Iesum autem cum venissent, ut viderunt eum jam mortuum, non fregerunt ejus crura, sed unus militum lancea latus ejus aperuit, & continuo exivit sanguis & aqua. Ioann. 19. vers. 31...34.

Post hæc cum ferè factum esset, venit ab Arimathia civitate Iudæa homo dives nomine Ioseph, qui Discipulus erat Iesu, & expectabat ipse regnum Dei: hic introivit ad Pilatum, & petiit ut tolleretur Corpus Iesu. Pilatus autem mirabatur si jam obiisset, & cum (obiisse) cognovisset à Centurione, permisit ut tolleretur Corpus Iesu. Matth. 27. vers. 57. 58. Marc. 15. vers. 42...45. Luc. 23. vers. 52...56. Ioann. 19. vers. 38.

*I. C. sepelitur in monumento novo, & sepulchrum custoditur.*

Venit Ioseph & tulit de cruce Corpus Iesu, & involvit sindone munda. Venit Nicodemus ferens mixturam mirrhæ, & aloës, quasi libras centum. Acceperunt ergo Corpus Iesu, & ligaverunt illud linteis cum aromatibus, sicut mos est Iudæis sepelire, & posuit Ioseph in horto, ubi erat monumentum suum novum, quod exciderat de petra, & in quo nondum quisquam positus fuerat, & advolvit faxum magnum ad ostium monumenti, & abiit. Matth. 27. vers. 59. 60. Marc. 15. vers. 46. Luc. 23. vers. 53. Ioann. 19. vers. 39...41.

Maria autem Magdalene, & Maria Ioseph sedentes contra sepulchrum aspiciebant ubi poneretur (Corpus Iesu) subsecutæ etiam mulieres, quæ cum eo venerant de Galilæa, viderunt monumentum, & quemadmodum positum erat Corpus Iesu, & revertentes paraverunt aromata & unguenta, & Sabbato quidem siluerunt secundum mandatum. Ex Matth. 27. vers. 61. Marc. 15. vers. 47. Luc. 23. vers. 55. 56.

Alte